

ՎԱՍՊՈՒՐԱԿԱՆԻ ՖԵՈԴԱԼԱԿԱՆ ՀՈԳԱՏԻՐՈՒԹՅԱՆ
ԶՍՐԳԱՑՄԱՆ ՄԻ ՔԱՆԻ ՀԱՐՑԵՐ (V—IX դդ.)

Վ. Մ. ՎԱՐԴԱՆՅԱՆ

V դարից նշանակալիորեն մեծանում է Արծրունյաց իշխանության ազդեցությունը Հայաստանի քաղաքական կյանքում: Մարդպետների ֆեոդալական շերտերը տան իրավասությանը ենթակա գավառների հաշվին Արծրունյաց իշխանները կարողացան ընդարձակել իրենց հողատիրությունները: Նրանց ներքին և արտաքին քաղաքականությունը նպատակամղված էր իրենց տոհմի իշխանության ֆեոդալական հիմքերի ըստ ամենայնի ամրապնդմանը, վասալական ոլորտի ընդլայնմանը, որի համար հիմք էր ծառայում նրանց հողային մեծ հարստությունը: Ընդ որում այս ուղեգիծը հստակորեն նշմարվում է վասալության իշխանության պատմության գրեթե ամբողջ ընթացքում: Սկզբնաղբյուրների վկայություններից երևում է, որ V դարում Արծրունյաց իշխանության լայնատարած հողային հարստություններին տիրում էին խոշոր արիստոկրատական տոհմերից սերած ֆեոդալները, որոնք իշխում էին իրենց ենթակա գավառներում և հիշվում են նահապետ, նախարար, տեր (իշխան)¹, իսկ նրանց իրավասությանը ենթակա շրջանները՝ տերություն (իշխանություն), նախարարություն անուններով: Ընդամենը Հայաստանի ֆեոդալական համակարգում Արծրունիները ճանաչվում էին որպես ավագ նախարարներ²: Արծրունյաց նախարարության գլուխը՝ տանուտերը (նահապետը), որպես հին արիստոկրատիայի ականավոր ներկայացուցիչ, իշխում էր իր տոհմի իրավասությանը ենթակա գավառներին, ընդարձակ հողատիրություններին, տնօրինում Արծրունիների իշխանության ռազմաքաղաքական և իրավական գործերը: Ընդարձակ էր իշխանության տնտեսական հիմնաշենքը, թեև պետք է նշել, որ ֆեոդալ-հողատերերի կողմից արդյունքների յուրացումը, հարկային հարաբերությունները, ֆեոդալական շահագործման այլևայլ ձևերը V դարում հիմնականում դեռևս ունեին նահապետական գծեր: Սակայն հետզհետե երկրամասի ֆեոդալականացման երկարատև (V—IX դդ.) ընթացքում ֆեոդալական հարաբերությունները կրեցին արմատական փոփոխություններ և հետզհետե կատարելագործվեցին շահագործման ձևերը:

V դարից Արծրունյաց իշխանության մեջ որոշ տարածում է գտնում սևալուհույան ինստիտուտը: Ն. Ադոնցի կարծիքով «սեպուհական իրավունքը» Հայաստանում ծագել է հայ Արշակունիների անկումից հետո և զարգացում է ապրել VI դարում³: Ա. Պ. Նովոսելցևը այդ ինստիտուտի ծագումը թվագրում է IV դարով⁴: Աղբյուրներից երևում է, որ V դարում սևալուհույան ինստիտուտը արդեն տարածված էր Արծրունյաց տիրույթներում: Դատելով ըստ ամենայնի, ֆեոդալական հողատիրության այդ տեսակը ձևավորվել է նախարարների հողային շնորհումների, նվիրատվությունների շնորհիվ: Սկզբնապես սևալուհուները հիմնականում ծառայապարտ խավ էին, ինչը հայտնապես երևում

¹ Մովսիսի Խորենացույ Պատմութիւն Հայոց, աշխ. Մ. Աբեղյան և Ս. Հարությունյան. Տփլիս, 1913, III, ԻԹ, էջ 292, 350:

² Փաստոսի Բուզանդացույ Պատմութիւն Հայոց. Ս. Պետերբուրգ, 1883, IV, ԻԳ, էջ 118:

³ Н. Адонц. Армения в эпоху Юстиниана. Ереван, 1971, с. 474, 475.

⁴ А. П. Новосельцев. Генезис феодализма в странах Закавказья. М. 1980, с. 197.

է Ղազար Փարպեցու, Եղիշեի և այլ մատենագիրների վկայություններից: Անշուշտ, սեպուհներն այդ շրջանում նախապատվությունը տալիս էին ոչ թե տնտեսական, այլ զինվորական զբաղմունքներին, մանր ազատների հետ համալրելով ֆեոդալական այրուձին: Փաստորեն նրանց հիմնական գործառնությունը հանգում էր տվյալ նախարարության քաղաքական շահերի և տոհմի պատվի պաշտպանությանը:

Ֆեոդալական հարաբերությունների հետագա զարգացման պայմաններում սեպուհները ձեռք են բերում որոշակի ինքնուրույնություն: Զբաղվելով տնտեսական գործունեությամբ, նրանց մեծ մասը աստիճանաբար վերածվում է ինքնուրույն տնտեսություն վարող հողատեր-ֆեոդալների (համախ նույնիսկ դրսևորում անջատողական միտումներ), պահպանելով հիմնականում նաև իր ծառայապատկանությունը: Այս ինստիտուտի ֆեոդալական բնույթը դրսևորվեց հատկապես այն բանում, որ սեպուհները հետզհետե վերածվեցին ժառանգական հողատերերի: Դրան զուգահեռ հին արիստոկրատիան՝ նախարարությունը, որ իր տրամադրության տակ էր պահում երկրամասի հողային հարստությունների մեծագույն մասը, նույնպես կրեց որոշակի փոփոխություններ: Ֆեոդալականացման պայմաններում տնտեսական կյանքի հինավուրց, նահապետական ձևերն ընդհանրապես արմատական փոփոխությունների ենթարկվեցին: Նախարարական կարգը ապրել էր իր գարը, այն պետք է իր տեղը զիջեր տնտեսական և քաղաքական նոր, ավելի կենսունակ ձևերի: Իհարկե, նախարարական շրջանի հարաբերություններն իսպառ չվերացան և մասամբ պահպանեցին իրենց ներհատուկ որոշ գծեր նաև հետագայում: Տվյալ տոհմի տիրույթները նախկինի պես շարունակեցին կոչվել հավաքական անունով՝ տուն, իսկ տոհմի սեփականությունը շարունակեց դիտվել որպես տոհմի անդամների «եղբայրական հաս», բաժին: Ընդ որում, տոհմի սեպուհները դիտվում էին որպես տվյալ տոհմի նույնիրավ անդամներ, «եղբայրներ»⁵: Այս սկզբունքը պահպանվեց ֆեոդալական հարաբերությունների զարգացման երկարատև ժամանակաընթացքում և, հավանաբար, նպաստեց սեպուհների վերածմանը տվյալ տոհմի միջին ֆեոդալների (գահակալ իշխանների): Միաժամանակ հարկ է նշել, որ հողատերերի այս նոր տեսակը արմատապես տարբերվում էր հին՝ նախարարական ավագանուց, սակայն այդ հանգամանքը չէր խանգարում, որպեսզի միջին հողատերերը կազմեին ֆեոդալական դասակարգի հիմնական շերտը: Որպես այդ պրոցեսի օրինաչափ հետևիվանք, խոշոր հողատիրությունը ձեռք բերեց ֆեոդալական աստիճանակարգմանը բնորոշ առանձնահատկություններ: Ուշագրավ է, որ Ղազար Փարպեցին սեպուհներին հիշում է նշանավոր նախարարներից հետո, տարբերակելով ավագ և կրտսեր սեպուհներին⁶: Միաժամանակ տեղի է ունենում հողատեր-սեպուհների սերտաճում ֆեոդալական ավագանու վերնաշերտի հետ: Ցուցանշական է, որ Արծրունյաց տոհմի պատմիչը իր տոհմի որոշ սեպուհների նույնիսկ անվանում է նախարարներ⁷: Սեպուհական հողատիրությունը միջին ֆեոդալների քաղաքական իշխանության հիմքն էր և, բնականաբար, Արծրունյաց իշխանության կարևորագույն սոցիալ-քաղաքական հենարանը: Այդպիսով միջին ֆեոդալները իրենց հողատիրական և քաղաքական կարողությամբ կազմում էին վասալական-քաղաքական այն հիմնական ուժը, որը մեծապես նպաստում էր Արծրունյաց իշխող տոհմաճյուղի տերունական իրավադրույթյան ընդլայնմանը:

Հարկ է նշել, որ Արծրունյաց իշխանությունում ֆեոդալական հարաբերությունների զարգացումը ուղեկցվում էր իշխող ֆեոդալական տների հողատի-

⁵ Թովմայի վարդապետի Պատմութիւն տանն Արծրունեաց. Թիֆլիս, 1917, III, Ժէ, էջ 344:

⁶ Ղազարայ Փարպեցույ Պատմութիւն Հայոց եւ Թուրք առ Վահան Մամիկոնեան, աշխ.

Դ. Տեր-Մկրտչյանի և Ստ. Մախսյանի. Թիֆլիս, 1904, Բ, էջ 58, 75:

⁷ Թովմա Արծրունի. II, 2, էջ 186:

րության ընդլայնմամբ: Մարզպանության շրջանում Արծրունիները նշանակալիորեն ընդարձակեցին իրենց հողատիրութիւնները: Դրան նպաստեց Մարդպետների ֆեոդալական գործող տոհմի անկումը ու քաղաքական ասպարեզից հեռանալը: Հայտնի է, որ Արծրունիների և Մարդպետների միջև անհաշտ մրցակցութիւն գոյութիւն ունեւ: Ինչպես հաղորդում է Փավստոս Բուզանդը, տակաւին IV դարում Արծրունյաց նախարարը սպանեց այդ տոհմի գլխավորին⁸:

Արաբական խալիֆայության տիրապետութեան ժամանակաշրջանում Արծրունյաց իշխանութեան նախարարները պահպանեցին իրենց ֆեոդալական իրավունքները և հողատիրութիւնները: Խալիֆայութեան սոցիալական և տնտեսական քաղաքականութիւնը և դրանք գործադրող հիմնարկները, ինչպես կարելի է մակաբերել սկզբնաղբյուրների տվյալներից, սկզբնական շրջանում նշանակալիորեն հարմարեցվում էին տեղական ֆեոդալական հարաբերութիւններին: Ընդ որում, խալիֆայութիւնը թե՛ այս և թե՛ հետագա ժամանակաշրջանում առանձին ունակութիւն չցուցաբերեց Հայաստանի, այդ թվում և Վասպուրականի տնտեսական ու հոգևոր-մշակութային յուրացման գործում: Այդ պատճառով երկրում պահպանվեցին ֆեոդալական հողատիրութեան ավանդական ձևերը: Սակայն դրա հետ մեկտեղ Հայաստանի նախարարական որոշ տներ վերացան քաղաքական ասպարեզից, սահմանափակվեցին ոմանց հողակալական իրավունքները: Միաժամանակ հարկ է նշել, որ արաբները շահագրգռված էին Հայաստանի հարկունակ բնակչութեան պահպանմամբ, որով, բնականաբար, կավելացնէին իրենց հարկային հասույթները: Դրա հետ մեկտեղ արաբները հանդուրժում էին նաև հարկունակ բնակչութեան անմիջական շահագործողներին՝ հայ ֆեոդալներին, որոնք խալիֆայութեան համակարգում հաճախ դառնում էին վերջինիս տնտեսական քաղաքականութեան կենսագործողներն իրենց իրավասութեանը ենթակա գավառներում: Տնտեսական համագործակցութեան հետ միաժամանակ Վասպուրականի ֆեոդալները արաբներին սատարում էին նաև ռազմական ասպարեզում⁹: Հարկային պարտութեան կատարումը, զինական աջակցութիւնը այն գլխավոր պայմաններն էին, որոնք արաբական զորապետներին և փոխարքաններին ստիպում էին տեղացի իշխանների հետ կնքած պայմանագրերով երաշխավորել հայ ֆեոդալների և նրանց ենթակա բնակչութեան անձեռնմխելիութիւնը¹⁰: Փաստորեն խալիֆայութեան տիրապետութեան պայմաններում Վասպուրականում հողատիրութեան ավանդական ձևերը մեծ փոփոխութիւններ չկրեցին: Արաբական աղբյուրների ընձեռած տվյալներից երևում է, որ արաբ զորապետների հետ Վասպուրականի իշխանների կնքած երկկողմ պայմանագրերի շնորհիվ երաշխավորվում էր նրանց ֆեոդալական իրավունքների, հողային սեփականութեան պահպանումը¹¹: Սամվել Անեցու վկայութեամբ, երբ խալիֆայութեան զորաբանակը գրավեց Վանա լճի շրջակայքում ընդգրկված գավառները, խալիֆայի ներկայացուցիչները, հայերի հետ փոխադարձ համաձայնութեամբ, հարկատվութեան պայմանով վերջիններիս թույլ տվեցին պահպանել իրենց հավատը¹²: Հայերի և արաբ զորապետների միջև կնքված պայմանագրերին ավելի հանգամանորեն անդրադառնում է Սեբեոսը: Արաբ զորապետների հետ կնքված պայմանագրերի շնորհիվ պահպանվեցին Վասպուրականի ֆեոդալական ժառանգական (հարկերի) և պայմանական (պարգևա-

⁸ Փավստոս Բուզանդ. IV, ԺԴ, էջ 98:

⁹ Genesi Regum ex regonitione Caroli Lachmani. Bonnae, 1834, p. 67.

¹⁰ Պատմութիւն Ղևոնդեայ Մեծի վարդապետի Հայոց, աշխ. Կ. Եղեան. Ս. Պետերբուրգ, 1887, հէ, էջ 152:

¹¹ Balādhuri. The origins of the islamic State being translation from the arabic accompanied with annotations, geographic and historic notes of the Kitāb Futūh al-Buldan. Vol. I, New York, 1916, p. 313—314, 315.

¹² Սամվելի քահանայի Անեցու Հավաքումը ի գրոց պատմագրաց, Վաղարշապատ, 1893, էջ 82:

կանք) համարվող հողատիրությունները, ինչպես նաև եկեղեցու և գյուղահամայնքների տրամադրության տակ եղած հողերը: Մեր ձեռքի տակ եղած սկզբնաղբյուրների ընձեռած տվյալներից դատելով, Վասպուրականի իշխանությունում խալիֆայության աստիճանավորները սահմանափակվեցին պետական հարկի գանձմամբ (հավական աղբյուրներում այս հարկը արտահայտված է հավաքական «արքունի հարկ», «արքունի հաս» հասկացություններով), չխառնելով երկրամասի հողատիրական հարաբերություններին: Իհարկե, ստեղծված պայմաններում Վասպուրականի իշխանության ֆեոդալների հողատիրությունների տնտեսական իրացման հնարավորությունները զգալիորեն սահմանափակվեցին: Գյուղացիության հավելյալ աշխատանքի մեծ մասի արդյունքները փոխանցվում էին խալիֆայության գանձառան, որպես «արքունի հարկ», որն այդպիսով վեր էր ածվում միասնական, կենտրոնացված հողային ռենտայի: Միաժամանակ, իհարկե, տեղական ֆեոդալներն իրենք նույնպես յուրացնում էին գյուղացու աշխատանքի արդյունքների զգալի մասը:

Օմայյանների օրոք ստեղծված քաղաքական և սոցիալ-տնտեսական իրավիճակում որոշ նպաստավոր պայմաններ ստեղծվեցին ֆեոդալ-հողատերերի համախմբման, ֆեոդալական տիրույթների ընդարձակման համար: Նախարարական հողատիրության պահպանումը, նույնիսկ ընդարձակումը, պետք է կարծել, չէր հակասում Օմայյան խալիֆայության համակարգում գործող հողասեփականացման օրենքներին, սկզբունքներին, ուստի հայ ֆեոդալների համախմբումը, առանձին տների խոշորացումը և զորացումը դառնում էր հնարավոր: Այս երևույթը նպաստում էր նաև մանր ֆեոդալների տնտեսական շահերին: Հարկային պարտույթները թեթևացնելու միտումով մանր հողատերերը, որոնք իրենց հողերը ստացել էին խոշոր ֆեոդալներից, գերադասում էին մնալ նրանց հովանավորության տակ, որի շնորհիվ նրանք հարկման էին ենթարկվում ոչ թե առանձին-առանձին, այլ հովանավորող տան հետ միասին: Ուստի հաճախ մանր հողատերերը համախմբվում էին ավելի խոշորների շուրջը: Այս ճանապարհով Օմայյաններին հպատակված երկրներում ոչ միայն պահպանվում, այլև հաճախ ստեղծվում էր ֆեոդալական խոշոր հողատիրություն¹³: Հարկ է նշել, որ Հայաստանում նույնպես այդ շրջանում ստեղծվեցին ֆեոդալական խոշոր հողատիրություններ, ի դեմս Բագրատունի, Արծրունի, Սյունյաց և ուրիշ տների:

Դրությունը փոխվեց Աբբասյանների իշխանության գլուխ անցնելուց հետո, երբ երկրում ստեղծվեց ծանր իրավիճակ, որից հայ ֆեոդալները երբեմն ելք էին գտնում ապստամբության կամ տարագրվելու միջոցով: Ղևոնդ պատմիչի մոտ պահպանվել է բնորոշ մի փաստ Վասպուրականի Արտազ գավառից 780-ական թթ. ֆեոդալական տոհմի տարագրության մասին¹⁴: Անշուշտ, ֆեոդալ-հողատերը առանց պատճառի չէր թողնի իր հալածների տիրությունները, տուն ու տեղը, տոհմական ստացվածքները: Փաստորեն ֆեոդալների տարագրվելը մի բողոք էր օտար տիրապետության հարաճուն ճնշման դեմ:

Հետզհետե ավելի սրվեցին շահագործող դասակարգի երկու տեսակների՝ խալիֆայության համակարգի ֆեոդալական ավագանու և տեղական հայ իշխանների միջև եղած հակասությունները: Շահերի բախման դեպքում, բնականաբար, զորեղի առջև տեղի էր տալիս ավելի թույլը: Մական ֆեոդալ-աղատների հարկադրական տարագրությունը բնավ չէր բարվոքում երկրում ստեղծված ծանր իրավիճակը: Ընդ որում մի քանի տարի հետո Վասպուրականից հեռացան նաև ուրիշ ֆեոդալներ¹⁵:

Չնայած սոցիալական, քաղաքական և կրոնական ծանր հալածանքներին, երբեմն ստեղծված անելանելի կացությունը, Աբբասյանների օրոք Արծրունյաց նախարարներին հաջողվեց պահպանել և նույնիսկ ընդլայնել իրենց ֆեոդալա-

¹³ А. Мец. Мусульманский ренессанс. М., 1973, с. 103.

¹⁴ Ղևոնդ. ԽԲ, էջ 168:

¹⁵ Հաաբումն Պատմութեան Վարդանայ Վարդապետի. Վենետիկ, 1862, ԽԱ, էջ 77:

կան իրավունքները, հողատիրությունները: Փաստորեն հայ նախարարների նկատմամբ Աբբասյանների որդեգրած քաղաքականությունը ոչ միշտ էր, որ ցանկալի արդյունքներ էր տալիս: Ուստի, ինչպես նկատում է X դարի արաբ մատենագիր Հիլալ առ Սաբին, նույնիսկ նշանավոր Հարուն ար Ռաշիդ խալիֆան (786—809) ստիպված էր անձամբ միջամտել Հայաստանի գործերին¹⁶: Արաբ մեկ այլ մատենագիր՝ Բալազուրին հիշում է հայ իշխանների ինքնակա վիճակը¹⁷: Ղևոնդը վկայում է, որ VIII դարի երկրորդ կեսին Արծրունյաց իշխան Գագիկը, Վասպուրականի իշխանների գլուխ անցած, ինքնուրույնաբար իշխում էր հայրենի տիրություններում, Վասպուրականը պաշտպանելով օտար ցեղերի հարձակումներից, նույնիսկ հարկման ենթարկելով Վասպուրականին հարևան որոշ շրջանների բնակչությանը¹⁸:

Միաժամանակ նկատելի է, որ վաղ միջնադարում ֆեոդալական հարաբերությունների զարգացման բնագավառում տեղի ունեցան արմատական փոփոխություններ: Հետզհետե խորացավ ֆեոդալական (նախարարական) խառոր հողատիրության ներտոհմային ստորարածանումը տվյալ տան տարբեր ազատների միջև: Այս երևույթին մեծապես նպաստեց սեպուհական-ֆեոդալական հողատիրության զարգացումը, ուրի սլայմաններում սեպուհները հետզհետե վերածվեցին ժառանգական հողասեփականատերերի: Այս երևույթը նշանավորում էր ֆեոդալական սեփականության զարգացման նոր փուլը, երբ հետագա ֆեոդալականացման պայմաններում ավելի ու ավելի էր մեծանում մասնատիրական հողասեփականության դերը, ավելի էին կատարելագործվում սեփականատիրական հարաբերությունները: Ընդ որում, սեպուհական հողատիրությունը, լինելով ֆեոդալական հարաբերությունների զարգացման արդյունք, միաժամանակ մեծապես նպաստում էր այդ հարաբերությունների խորացմանը: Հողատիրության այդ տեսակի զարգացման միտումը կախյալ գյուղացիության շահագործման ուժեղացումն էր, հաստիքաբեր նոր միջոցների ձեռքբերումը: Ուստի սեպուհ-ֆեոդալների խավի կողմից երկրամասի ֆեոդալականացման ընթացքը ուժեղացնելուն ընդդիմակալում էր ոչ թե հին նախարարական ավագանին, այլ ֆեոդալական կախման մեջ ընկած գյուղացիությունը: Ունենալով ընդարձակ հողատիրություններ, սեպուհ-հողատերերը տվյալ տան ներսում ստեղծեցին իրենց տոհմաճյուղը և մասնատիրական ֆեոդալական տնտեսությունը: Բնականաբար, որոշակի փոփոխություններ կրեց նաև հայրենական հողատիրությունը, որը ավելի ու ավելի էր վերածվում տնտեսական զորեղ գործոնի, առանց որի միջին ֆեոդալները զուրկ կլինեին քաղաքական ազդեցությունից: Վերջիններիս հանդեպ զուտ քաղաքական առումով տերունական իրավագործությունը շարունակում էր պահպանել տոհմի նախարարը, որը, հասկանալի է, ուներ նաև իր առանձին հայրենակալվածքը: Նոր հարաբերությունները ծանր հարված հասցրին նախարարական հնամենի հասարակարգին, խորտակեցին տոհմական շատ վերապորուկներ: Այս պայմաններում միջին (կամ գահակալ) ֆեոդալի՝ իր ուրույն ֆեոդալական տնտեսության հոգսերով տարված տնտեսատիրոջ առաջնային գործառնությունն էր դառնում գինական ծառայությունն իր սյուզերենի հանդեպ, և շահագործվող խավերից ֆեոդալական ղեկավարի ստացումը, որի շնորհիվ մեծանում էին նրա տնտեսական հասույթները, առավել ապահով, ավելի ազդու էր դառնում նրա քաղաքական ուժն ու ինքնուրույնությունը, հնարավոր էր դառնում կախման մեջ դնել մանր ազատանուն, պահել սեփական զորամիավորումներ: Այս երևույթը ցայտունորեն դրսևորվեց Արծրունյաց տոհմի հետագա զարգացման, ներքին ստորաբաժանման, ճյուղավորման մեջ: Հատկանշական է,

¹⁶ Хилал ас Сабъи. Установления и обычаи двора халифов (Русум д'ар ал Халифа), пер. И. Михайлов. М., 1983. с. 43, 44.

¹⁷ Baladhuri. I, p. 330.

¹⁸ Ղևոնդ. ԼԲ, էջ 133—134:

որ եթե V դարի կեսին այդ տոհմի ներսում գոյություն ունեւ ընդամենը երկու ճյուղ¹⁹, ապա IX դարի առաջին կեսին տոհմն ունեւ ավելի քան 16 ճյուղ²⁰, որոնք, անշուշտ, առաջատար դեր ունեին Վասպուրականի Արծրունյաց իշխանությունում: Ուշագրավ է, որ Արծրունի պատմագիրը Արծրունյաց մեծ իշխանի վասալ ֆեոդալների մեջ հիշում է սեպուհներ Դավիթին ու Սահակին, առանց նշելու նրանց տոհմական պատկանելությունը²¹: Ակներե է, որ հիշյալ սեպուհները Արծրունիներ էին և այնքան հայտնի, որ մատենագիրը հարկ չի համարել նրանց տոհմը հիշել: Այս փաստը վկայում է այդ սեպուհների ինքնուրույնության, սեփական զորամիավորում, նաև հայրենատիրույթ և բերդեր ունենալու մասին: Թուվա Արծրունու վկայությամբ, այդ և մյուս սեպուհները Վասպուրականի մեծ իշխանի կանչով ներկայացան իրենց զորաբաժիններով, որպեսզի նրա դրոշի ներքո մեկնեն մարտի, ընդդեմ հալիֆայության կամակատարների²²: Այս հանգամանքը վկայում է Արծրունյաց գահերեցից նրանց կախվածության մասին: Իհարկե, այստեղ խոսք կարող է լինել միայն քաղաքական կախվածության մասին: Ֆեոդալական հասարակարգի տարբեր շերտերը միայն այդ ճանապարհով կարող էին միավորվել: Այն ժամանակվա տարապայման իրավիճակում, ֆեոդալական միջավայրում հնարավորը քաղաքական համախմբումն էր: Այդ համախմբումը արտահայտվում էր վասալ ֆեոդալների կողմից մեծ իշխանին զորական ուժեր տրամադրելու և նրա մոտ որևէ պաշտոն վարելու մեջ: Թուվա Արծրունին վկայում է, որ IX դարի կեսին, երբ Վասպուրականի գահադուխտ իշխան Աշոտ Արծրունին, տեղի տալով հալիֆայության գերակշիռ ուժերի առջև, ամրացավ Նկան ամրոցում, իր հետ վերցրեց ֆեոդալ-ազատների, որոնք նրա մոտ վարում էին այս կամ այն պաշտոնը: Նրանց մեջ էին իշխանի թիկնապահ Վահրամ սեպուհը և վասալական ծառայություններ կատարող ուրիշ սեպուհներ²³:

Կասկածից վեր է, որ եթե սեպուհ-ֆեոդալները, որպես ֆեոդալական ավագանու միջին շերտի ներկայացուցիչներ, ունեին իրենց սեփական զորամիավորումները, ապա պետք է ունենային նաև իրենցից կախյալ ազատներ, քանի որ առանց նրանց հնարավոր չէր զորաբանակ կազմել: Որոշակի քաղաքական կախվածության մեջ լինելով Արծրունյաց մեծ իշխանից, միջին ֆեոդալը (որը հաճախ կարող էր լինել երբեմնի մանր ազատը, որ առաջ էր քաշվել ծառայության ժամանակ), որպես հայրենատեր ֆեոդալ և մեծ իշխանի վասալ, իր հերթին ուներ իր վասալները, ի դեմս մանր ազատների, որոնց նկատմամբ միայն նա ուներ տերական իրավունքներ: Իրենց ծառայության դիմաց մանր ազատները սյուզերենից ստանում էին պայմանական հողաբաժին, թեև պետք է ընդունել, որ այս սկզբունքը ոչ միշտ էր գործում: Երբեմն մանր ազատներն իրենց ծառայության դիմաց պարզապես ուժիկ էին ստանում: Միջին ֆեոդալներից ունեցած կախվածության պայմաններում ծառայապարտ մանր ազատները, բնական է, չէին կարող պահել սեփական զորաբաժին, քանի որ վասալական կացության բերումով նրանք ոչ միայն քաղաքական, այլև տնտեսական կախման մեջ էին իրենց սյուզերենից: Այսօրինակ հանգամանքներում մանր ազատները, հասկանալի է, չէին կարող ներկայացնել միասնական քաղաքական ուժ և հանդես էին գալիս որպես տարբեր ֆեոդալների իշխանությանը ենթակա, տնտեսական ու քաղաքական ինքնուրույնությունից զուրկ, բաց իհարկե ֆեոդալական դասի արտոնություններից օգտվող խավ: Սեփական զորաբաժիններ ունենալու հանգամանքն ինքնին միջին ֆեոդալներին ընձեռում էր որոշակի ինքնուրույնու-

19 Ղ ա ղ ա ր Փ ա ր ա լ ե ց ի. ԽԲ, էջ 160. ԽԷ, էջ 185: Եղիշէի Վասն Վարդանայ և Հայոց պատերազմին, աշխ. Ե. Տէր-Մինասեան. Երևան, 1957, էջ 99, 100:

20 Թ ո Վ մ ա Ա ր ծ ր ո լ ի. II, 2, էջ 186:

21 Ն ո լ յ ն տ ե ղ ու մ:

22 Ն ո լ յ ն տ ե ղ ու մ:

23 Թ ո Վ մ ա Ա ր ծ ր ո լ ի. III, Բ, էջ 218—219:

թյուն, որի հիմքը հայրենատիրության առկայությունն էր: Հարկ է նշել, որ հողատիրության հայրենականը ձևի ազդեցությունը ֆեոդալականացման խորացմանը զուգընթաց գնալով ավելի էր մեծանում: Այն գերիշխող էր ոչ միայն վասսպուրականի իշխանության գյուղաշխարհի հազարավոր համայնքներում, այլև քաղաքներում, որոնք ծագելով գյուղերից, շարունակում էին մնալ ֆեոդալ-հողատիրոջը ենթակա հողատիրություններում՝ որպես ֆեոդալիզմին բնորոշ հասարակական օրգանիզմ: Նմանօրինակ հանգամանքներում, հասկանալի է, միջին ֆեոդալների քաղաքական անջատողականությունը ավելի իրական էր դառնում: Ընդ որում վերջիններս միաժամանակ շաղկապող օղակ էին մեծ իշխանի և մանր ազատների միջև: Ուստի ֆեոդալական տան նախարարի գործությունը մեծապես պայմանավորված էր միջին ֆեոդալների դիրքորոշմամբ, որոնց մեծ իշխանը հնազանդության մեջ էր պահում ոչ թե տնտեսական, այլ սոսկ քաղաքական գործոնի շնորհիվ:

Մանր ազատներին տրված հողաբաժինները պայմանական տիրույթ՝ պարգևականք էին, որոնց տերերը քաղաքական տեսակետից ունեին կրավորական դեր, իրենց սյուզերեն միջին ազատի դեմ չէին կարող համախմբված հանդես գալ: Սակայն պետք է ի նկատի ունենալ, որ առանց մանր ազատների, միջին ֆեոդալների գոյությունն անհնար էր: Ընդհանուր առմամբ առկա է ֆեոդալական հողային սեփականության յուրօրինակ աստիճանակարգում, որտեղ առաջատար դեր ունեին հայրենատեր ֆեոդալները: Ֆեոդալական-վասալական հարաբերություններ պայմաններում վճռորոշ դերն, անշուշտ, հայրենակալվածքին էր, քանի որ հատկապես այն էր նպաստում ֆեոդալական հարաբերությունների խորացմանը, մինչդեռ այդ առումով պարզեցական տեսակի հողատիրությունները ունեին համեմատաբար համեստ դեր, քանի որ զուրկ էին ինքնուրույնության այն հնարավորություններից, որոնցով մեծապես օժտված էր հայրենակալները:

Այն պարագան, որ տանուտերը միջին ֆեոդալների նկատմամբ շուրջ ֆեոդալական, տնտեսական իրավագործություն և օգտվում էր միայն քաղաքական լծակներից, պատճառ էր դառնում, որպեսզի նա անհնազանդ ֆեոդալից հողերը բռնագրավեր միայն քաղաքական միջոցներով, այն է՝ բռնի ուժի գործադրմամբ: Ըստ Թովմա Արծրունու և նրա շարունակողի տեղեկությունների, դա տեղի էր ունենում զինված միջամտությամբ, մեծ իշխանի կողմից ապրստամբ վասալ ֆեոդալի իրավասությանը ենթակա գավառի (բերդերով հանդերձ) գրավմամբ: Նման քայլով, բնականաբար, մեծ իշխանը միջին ֆեոդալին հարկադրում էր ճանաչել իր տերունական իրավագործությունը՝ աչդպիսով պատժելով իր իրավունքները ոտնահարող վասալին²⁴: Փաստորեն վասալուրականի մեծ իշխանի և նրա վասալ միջին ֆեոդալների միջև եղած փոխհարաբերությունները կարգավորվում էին քաղաքական միջոցներով: Հասկանալի է, միայն դիմական ուժի առկայությամբ էր, որ մեծ իշխանը պահպանում էր իր գերակա դիրքը և տերունական իրավունքները: Հակառակ պարագայում նա ստիպված էր լինում հաշտվել իր իրավունքների քամահրման փաստի հետ: Այդպես վարվեցին, օրինակ, վասալուրականի մեծ իշխաններ Աշոտ Արծրունին և նրա հաջորդ Դերենիկը, երբ Արծրունյաց տոհմի երկրորդական ճյուղի իշխան, միջին ֆեոդալ Գուրգեն Ապուպելճը հրաժարվեց ենթարկվել նրանց իշխանությանը²⁵:

Այն փաստը, որ միջին ֆեոդալը և մեծ իշխանը սերում էին նույն տոհմից, կարող էր պատճառ դառնալ, որպեսզի նախկին սեպուհը, դառնալով ինքնու-

24 Թովմա Արծրունին վկայում է, որ մեծ իշխան Դերենիկ Արծրունին ապստամբ միջին ֆեոդալ Հասան Արծրունի իշխանից խլեց նրա տիրույթները և Սևան ամրոցը, ապա վերստին հանձնեց նույն իշխանին (Թովմա Արծրունի. III, Ի, էջ 362—363): Անանունի տվյալներով Արծրունյաց մեծ իշխան Գագիկը զենքով խլեց միջին ֆեոդալներ, ապստամբած Շապուհի և Գրիգոր Ապուհամզայի տիրույթները, ապա վերադարձրեց՝ կրկին հաստատելով նրանց հողատիրական իրավունքները (նույն տեղում, IV, Գ, էջ 455—456):

25 Նույն տեղում, III, Ժէ, էջ 343—345:

րույն հողատեր, իր տիրույթներին տիրեր ոչ թե պայմանական, այլ ժառանգա-
կան հիմունքներով²⁶, քանի որ նույն տոհմի հողասեփականությունը դիտվում
էր որպես տվյալ տոհմի անդամների «եղբայրական հաս» (բաժին)²⁷: Հենց այս
խրոհության ուժով էր, որ տվյալ տոհմաձյուղը հարատևում էր այնքան ժամա-
նակ, քանի դեռ գոյություն ուներ տոհմը: Նույնիսկ այն դեպքում, երբ տոհմա-
ձյուղի վախճանված ղեկավարին փոխարինում էր մանկահասակ որդին կամ
կինը, միևնույն է, տվյալ գերիշխող տոհմից ընձյուղված ֆեոդալական տոհմ-
աձյուղը շարունակում էր հարատևել որպես տնտեսական ինքնուրույն միա-
վոր: Հարկ է նշել, որ մեծ իշխանը նաև կապող օղակ էր միջին ֆեոդալների
միջև: Անհրաժեշտության դեպքում նա համախմբում էր նրանց, ապահովելով
իր իշխանության, հետևաբար նաև նրան ապավինած ֆեոդալների անվտանգու-
թյունը: Այս տեսակետից հատկանշական է, որ մեծ իշխան Աշոտ Ա թողնել է
850 թ. դիմելով իր վասալ իշխաններին, հիշեցրեց, որ հայրական խնամք է
տարել նրանց նկատմամբ, ապահովել նրանց մշտական անվտանգությունը²⁸:
Անշուշտ, տոհմի տանուտերը միջին ֆեոդալներ դարձած սեպուհներին իրա-
վունք էր վերապահում ստեղծելու ինքնուրույն տոհմաձյուղ, քանի որ դրա հա-
մար առկա էին անհրաժեշտ տնտեսական ու քաղաքական պայմաններ. այս
դեպքում, իհարկե, նկատի էր առնվում նրանց նվիրվածությունը տվյալ տոհ-
մին և, ամենից առաջ, մեծ իշխանին: Հասկանալի է, միջին ֆեոդալները ան-
հրաժեշտ դեպքերում իրենց ռազմուժով պետք է օգնության հասնեին գահերեց
իշխանին: Նրանք երբեմն նույնիսկ այնքան էին զորանում, որ մրցակցում էին
Արծրունյաց մեծ իշխանի հետ: Այսպես օրինակ, Ապուպելճի որդի Գուրգենն
այնքան էր ուժեղացել, որ նույնիսկ գրավեց Արծրունյաց գերիշխող տոհմա-
ձյուղի հողատիրությունների մի զգալի մասը: Վերջիններս թեև փորձեցին զենքի
ուժով վերադարձնել գրավված շրջանները, բայց ապարդյուն²⁹:

Կարելի է կարծել, որ սեպուհները, դառնալով միջին ֆեոդալներ, իրենց
տնտեսությունը կազմակերպում էին ոչ թե իրենց հայրենականքը համարվող
բոլոր տիրույթներում, այլ դրանց մի մասում: Այսպես կարծելու հիմք է տալիս
այն պարագան, որ միջին ֆեոդալը ուներ մանր ազատներից համարվող զորք
և, հետևաբար, այն պահպանելու համար իր հողերի մեծ մասը պետք է բաժա-
ներ իր զորքում ծառայող մանր ազատներին: Մնացած մասը վերածվում էր
սեփական կալվածաչին տնտեսության, որը համարվում էր հայրենականքի լոկ
մի մասը և բնավ չէր վերածվում նոր ձևավորված առանձին հայրենատիրությի:
Հայրենականքի այս մասի մշակումը պետք է կազմակերպվեր հայրենատեր
ֆեոդալի հրահանգներով, և նա էր անմիջաբար իրացնելու իր տիրույթների այդ
մասից ստացվող հասույթները՝ նրա վրա նստած գյուղացիներից վերցնելով
հողաչին ունեւտ (վերջինս գոյանում էր աշխատավոր գյուղացիների զանազան
պարհակներից, պարտույթներից ու վճարումներից):

Սկզբնաղբյուրների վկայություններից երևում է, որ քննարկվող պատմա-
շրջանում Վասպուրականի խոշոր ֆեոդալական հողատիրության բնորոշ առանձ-
նահատկություններից մեկը գերիշխող ֆեոդալական տոհմի տիրույթները զենքի
ուժով ընդլայնելու սկզբունքի գործադրումն էր: Թովմա Արծրունու վկայու-
թյամբ, Վասպուրականի իշխան Դերենիկ Արծրունու վախճանվելուց հետո նրա
որդին՝ Գագիկը տիրելու էր ոչ միայն Ռշտունյաց գավառին, այլև մերձակա այն
շրջաններին, որոնք նա ի զորու կլինեին գրավել³⁰: Ակներև է, որ այս հանգա-
մանքը պետք է լինեին ֆեոդալական հարաբերությունների զարգացման դրսե-
վումներից մեկը, այն բանի հայտանիշը, որ Վասպուրականի իշխանություն-

26 Նույն տեղում, ԺԴ, էջ 328:

27 Տե՛ս նույն տեղում, ԺԷ, էջ 344:

28 Նույն տեղում, Բ, էջ 222:

29 Նույն տեղում, ԺԵ, էջ 339, ԺԷ, էջ 344:

30 Նույն տեղում, ԻԲ, էջ 374:

նում ֆեոդալականացումն ընթանում էր ոչ միայն խորությամբ, այլև լայնությամբ, հանգամանք, որն անշուշտ խոսում էր նաև Արծրունյաց գերիշխող տոհմաճյուղի քաղաքական և տնտեսական գործուն դերի մասին: Այս երևույթի տիպական լինելն է վկայում այն փաստը, որ Արծրունյաց պատմագիրը հաղորդում է նաև Դերենիկի մյուս որդու՝ Գուրգենի կողմից իր տիրույթները ըստ հնարավորին զենքի ու ժողով ընդլայնելու մասին: Պատմագիրը այդ կարգի տվյալներ է բերում նաև Վասպուրականի ուրիշ իշխանների վերաբերյալ: Այս փաստերից միաժամանակ կարելի է հետևեցնել, որ ֆեոդալական խոշոր հողատիրությունը շուրջ վերջնական ու որոշակի սահմաններ, դեռևս կարող էին ընդլայնվել կամ սեղմվել տիրող ֆեոդալի ղեկավարից և քաղաքական իրադրությանը համապատասխան:

Վասպուրականի իշխանության միջին հողատեր ֆեոդալները, մանր ազատները դիտվում էին որպես «բնիկ հեծելազունք»³¹, որը, իհարկե, ամենից առաջ տոհմիկության ցուցանիշ էր: Սակայն նրանք համարվում էին ազատ թե՛ իրենց տոհմիկության և թե՛ քաղաքական ու տնտեսական կարողության պատճառով: Այս հանգամանքը ի նկատի ունենալով Գրիգոր Նարեկացին, երբ գրում էր, որ ֆեոդալ ազատները «ազատ են հարկերից, լծից, իշխող, հրամայող են և ոչ թե կառավարվող»³², Այսպիսով, «ազատ», «ազատանի» հասկացությունները ունեին տնտեսական և քաղաքական բովանդակություն: Դրանք ամենից առաջ արտահայտում էին ապահարկության, լծապարտ չլինելու, տոհմիկության և իշխելու հատկանիշներ: Սակայն պետք է նշել, որ ֆեոդալական աստիճանակարգման ուժով ազատը միաժամանակ իր տիրոջ (սյուզերենի) ծառան (վասալն) էր: Ուշագրավ է, որ Անանիա Նարեկացին այս առնչությամբ գրում է, որ երբեմն ֆեոդալ-ազատը կարող էր ունենալ շատ վասալներ, բայց կարող էր և ինքը ծառայել ուրիշ իշխանի³³:

Ֆեոդալ հողատերեր փաստորեն հասույթներ էր ստանում իր սեփական տնտեսությունից: Դրանց մի զգալի մասը հպատակ գյուղացիներից վերցվում էր դրամով³⁴: Այս հանգամանքն ինքնին կարող էր հնարավորություն ընձեռել ֆեոդալին գանձեր կուտակելու: Մատենագրական կցկտուր տվյալներից երևում է, որ Վասպուրականի ֆեոդալ-հողատերերը ունեին իրենց գանձատները³⁵: Նրանց մի զգալի մասը գանձակուտակմամբ շոշափելի հարստություն էր դիպել³⁶: Այս պայմաններում, բնականաբար, մեծանում էր ֆեոդալական տնտեսության նշանակությունը, որպես հարստության կուտակման անհատնում աղբյուրի: Ընդամիսն երբեմն ազատը նույնիսկ դրամով նոր հողեր էր ձեռք բերում:

Վասպուրականի ֆեոդալական հողատիրության աճը է՛լ ավելի մեծացրեց այդ իշխանության տնտեսական կարողությունը, ամրապնդեց Արծրունիների իշխանության տնտեսական և քաղաքական հիմքերը: Դրա հետ մեկտեղ այդ տոհմի շուրջը համախմբվեցին Վասպուրականի ֆեոդալական այլևայլ տներ: Անշուշտ, տանուտիրական վաղնջական համակարգը կորցնում էր իր նշանակությունը, ստեղծված պայմաններին համապատասխան ձեռք բերելով նոր բո-

³¹ Նույն տեղում, Ը, էջ 276—277:

³² Գրիգորի Նարեկայ վանից վանականի Մատենագրությունը. Վենետիկ, 1840, էջ 85—86:

³³ Մաշտոցի անվ. Մատենադարան (ՄՄ), ձեռ. № 4682, էջ 3ա:

³⁴ Յովհաննու կաթողիկոսի Դրասխանակերտեցույ Պատմութիւն Հայոց. Թիֆլիս, 1912, էջ 330:

³⁵ Թ ո վ մ ա Ա ր ծ ր ու ն ի. II, 2, էջ 191. III, Ժէ, էջ 345, Ի, էջ 360: Հ ո վ հ ա ն ն և ա Դ ր ա ս խ ա ն ա կ ե ր տ ց ի, էջ 270 և այլն:

³⁶ Խոշոր գանձարանատեր է հիշվում VII դարի Վասպուրականի իշխաններից Վարդ Պատրիկ Ռշտունին (տե՛ս Ա. Ս ր ա պ յ ա ն. Հայ միջնադարյան գրույցներ. Երևան, 1969, էջ 230—231): Մեծ գանձեր էին կուտակել իշխան Վասակ Արծրունին, Վասպուրականի Սևան բերդի տեր Հասան Արծրունին և ուրիշներ (տե՛ս Թ ո վ մ ա Ա ր ծ ր ու ն ի. II, 2, էջ 191. III, Ի, էջ 360 և այլն):

վանդակություն: Եթե մինչ այդ տանուտերը իրավասու էր սոսկ իր տոհմի նկատմամբ, ապա VIII դարից առավել զորեղ տները տերունական իրավունք են ձեռք բերում նաև մյուս, պակաս կարևոր տոհմերի նկատմամբ: Այս երևույթը հետզհետե խորանալով, դառնում է բնականոն, որի հետևանքով Վասպուրականի իշխանության պակաս նշանավոր տոհմերը, ճանաչելով Արծրունիների գերակայությունը, հետզհետե ձուլվում են նրանց հետ, վերածվելով երկրորդական տոհմաճյուղերի: Ուշագրավ է, որ նույնիսկ Ռշտունյաց երբեմնի զորեղ տոհմի որոշ իշխաններ հիշվում են որպես Արծրունիներ³⁷: Իհարկե, Վասպուրականի ֆեոդալական տների մի զգալի մասը վերացավ քաղաքական ասպարեզից ոչ թե այն պատճառով, որ ձուլվեց Արծրունիներին, այլև որովհետև խիստ թուլացած լինելով հալիֆայության հարուցած ծանր հալածանքներից, ուրիշ ելք չգտավ, քան Արծրունիների հովանավորությանը ապավինելը և այդ ճանապարհով պահպանեց իր գոյությունը: Սակայն հողատերերի մի մասը վերացավ քաղաքական ասպարեզից: Նրանց հողատիրությունների զգալի մասն անցավ արաբական ցեղերին: Այդ կարգի հողերը, գրում է Բալադուրին, սովորաբար տրվում էին եկվոր ցեղերին, հաշվի առնելով նրանց կողմից մահմեդականություն ընդունելու վաղեմությունը, ինչպես նաև հալիֆայության ռազմարշավներին մասնակցելու հանգամանքը³⁸: Հայաստան թափանցած ցեղերը, դատելով ըստ ամենայնի, ունեին նշված առավելությունները: Թովմա Արծրունու հաղորդման համաձայն, IX դարի կեսին Վասպուրական ներխուժած օտար ցեղերը սփռվեցին ուրիշ շրջաններում, միմյանց միջև բաժանելով հողատարածությունները³⁹: Բնական է, բաշխվում էին հայ իշխանների լքած հողերը, որոնք, ըստ երևույթին, պետք է մշակեին դարձյալ հայ շինականները: Այս շրջանում հալիֆայության զորապետները խրախուսում էին հայ ֆեոդալների հողերի բռնագրավումը, որպես նրանց թուլացնելու արմատական միջոց, քանի որ վերջիններս ունեւ զորությունը պայմանավորված էր նրանց հողային հարստությամբ: Ստեղծված օրհասական պայմաններում, ինչպես պատմում է Արծրունյաց տան մատենագիրը, զորեղները գազանացած՝ անամոթաբար կողոպուտի էին մատնում բովանդակ Վասպուրականը⁴⁰: Հասկանալի է, նմանօրինակ հանգամանքներում ֆեոդալ-հողատերը, զրկվելով իր շարժական և անշարժ ստացվածքից, ընկնում էր անելանելի կացության մեջ և ստիպված համագործակցում էր հայրենի նահանգը շահատակողներին կամ հեռանում օտար վայրեր: Ֆեոդալ-հողատերերի սեփականությունը այն աստիճան էր վտանգի ենթարկված, որ, ինչպես հավաստում է Արծրունյաց պատմագիրը, նույնիսկ հալիֆայությանը նվիրված հայ իշխանները ապահով չէին զգում իրենց և հարստությունը թաղում էին գետնի տակ⁴¹:

Վասպուրականի իշխանության ֆեոդալական հողատիրությունը զգալի հարվածներ կրեց հատկապես 850-ական թթ., երբ բազմաթիվ անհնազանդ հայ իշխաններ ունեզրկվեցին: հալիֆայությունը բնակչությանը հարկում էր, հաշվի չառնելով երկրի տնտեսական հնարավորությունները, բնակչության հարկունակությունը: Հարկային բեռի մեծացումը, հողային ֆոնդի նվազումը, զանազան շարաշահումները մեծապես վնասեցին երկրամասի տնտեսական կյանքի բնականոն զարգացմանը: Որոշ գավառներ փաստորեն մարդաթափ եղան, այդ շրջանների հնօրյա անդատանները գրեթե դադարեցին մշակվելուց: Բնական է, որ ստեղծված պայմաններում խաթարվում էին նաև բուն ֆեոդալական հարստությունները, խախտվում դրանց ավանդական հիմքերը: Երկրամասի

37 Յ ո վ հ ա ն Մ ա մ ի կ ո ն ե ա ն. Պատմութիւն Տարօնոյ, աշխ. Ա. Գ. Աբրահամյանի. Երևան, 1941, էջ 149:

38 Baladhuri. II, New York, 1924, p. 242—243.

39 Թ ո վ մ ա Ա Ր Ժ Ր Ո Ւ Ն Ի. III, Ե, էջ 251:

40 Ն ու յ ն տ եղ ու մ, ԺԲ, էջ 312:

41 Ն ու յ ն տ եղ ու մ, II, 2, էջ 191:

տնտեսական զարգացումը ոչ միայն դանդաղում, այլև ենթարկվում էր հիվանդագին կերպափոխման, այլաձևման: Այս պայմաններում հաճախ նույնիսկ խեղդալական խոշոր հողատիրությունների տեր եկեղեցին զրկվում էր իր արտոնություններից, ապահովությունից⁴²: Անկայուն իրավիճակը իրեն զգալ էր տալիս նաև հետագայում: Այս տեսակետից հատկանշական է Անանիա Նարեկացու դիտողությունը, թե «այսօրվա ընշավետը վաղը դառնում է աղքատ», կորցնելով իր առանձնաշնորհումները⁴³:

870-ական թթ. Արծրունիների իշխող տոհմաճյուղի վերականգնված գեր-իշխանության, երկրամասում հաստատված հարաբերական խաղաղության պայմաններում Վասպուրականի իշխանությունում տեղի է ունենում ֆեոդալական հողատիրության աճ, ամրապնդվում են նաև եկեղեցու ֆեոդալական հիմքերը: Հովհաննես Դրասխանակերտցին վկայում է, որ X դարի շեմին Վասպուրականում «...Սուրբ հիմունք եկեղեցույ անվողով մնացեալ կանգնէին, և շինութիւն և խաղաղութիւն և նորոգութիւն և յապահովութիւն աշխարհի բնաբար բերիւր. և լիութիւն և պտղաբերութիւն ի շնորհացն Աստուծոյ պարգևէր»⁴⁴: Պատմագրի այս տեղեկությունը որոշ հիմք է տալիս կարծելու, որ Վասպուրականի իշխանության վերջին փուլում երկրամասում նկատվում էին տնտեսական և սոցիալական որոշ տեղաշարժեր, որոնց պայմաններում Արծրունյաց գահաժողովրդը վարում էին ֆեոդալական հողատերերի, եկեղեցու շահերից բխող քաղաքականություն: Իրենց հողատիրությունը ընդարձակեցին Վասպուրականի թե՛ աշխարհիկ և թե՛ հոգևոր ֆեոդալները: Ընդ որում վանական հողատիրության աճը հիմնականում կատարվում էր աշխարհիկ ֆեոդալների ընծալաբերությունների միջոցով: Այսպես, Դերենիկ իշխանի մահից հետո (885 թ.) նրա որդիները Աղթամարի Ս. Խաչ վանքին են ընծայում հինգ գյուղ իրենց բնակիչներով, նույնիսկ Բերկրի քաղաքը իր շրջակայքի հողերով, Մանակերտի քարհանքը⁴⁵: Մեծ նվիրատվություններ էին արվում հատկապես Վարագավանքին, որն ուներ ընդարձակ հողեր⁴⁶: Հայտնի էին Նարեկավանքը⁴⁷, Իլուվանքը⁴⁸ և այլն:

Կարելի է կարծել, որ եկեղեցական հողատիրության աճը նպաստում էր արտադրողական ուժերի զարգացմանը, ֆեոդալական հողատիրության արտադրական հնարավորությունների ընդլայնմանը: Ընդամենն վանական հողատիրության ընդարձակմանը զուգընթաց եկեղեցու տիրությունների մի զգալի մասը վեր էր ածվում ազարակների, որտեղ աշխատում էին տեղաշարժման իրավունքից զրեթե զուրկ շինականները: Այս տեսակետից հատկանշական է, որ Խոսրով Անձևացին իր մեկնողական գործերից մեկում հիշում է «ծառային որ յագարակէն գայցէ»⁴⁹: Միաժամանակ երևում է, որ ծառաները զուրկ էին սեփական տնտեսություն վարելու իրավունքից, ուստի Խոսրով Անձևացին գրում է. «Ծառայք ի տէրանց ղպէտս իւրեանց հայցէն»⁵⁰: Վասպուրականի մեկ այլ

42 Նույն տեղում, ԺԸ, էջ 346:

43 ՄՄ, ձեռ. № 4682, էջ 3ա:

44 Հովհաննես Դրասխանակերտցի, էջ 325:

45 Թոմմա Արծրունի. III, Ի, էջ 369: Այստեղ պատմիչի հիշատակած Աղթամար կղզու Ս. Խաչ վանքը, անշուշտ, չպետք է նույնացնել հետագայում նույն կղզում Գագիկ Արծրունու կառուցած համանուն տաճարի հետ, քանի որ նվիրատվություն կատարող Արծրունի իշխան Աշոտը վախճանվել էր 905 թ., մինչդեռ Աղթամարի Գագիկան տաճարը կառուցվել է 920-ական թթ.: Ըստ երևույթին, այստեղ խոսքը գնում է կղզում ավելի վաղ եղած համանուն եկեղեցու մասին:

46 Տե՛ս ՄՄ, ձեռ. № 4878, էջ 285ա, 286բ:

47 Ստեփանոսի Տարօնեցույ Ասողկան Պատմութիւն տիեզերական, աշխ. Ստ. Մալխասյանց-Ս. Պետերբուրգ, 1885, III, է, էջ 174:

48 ՄՄ, ձեռ. № 5467, էջ 21ա:

49 ՄՄ, ձեռ. № 2607, էջ 23ա:

50 Նույն տեղում, էջ 85ա, 192ա:

մատենագիր՝ Հակոբ Նարեկացին գրում է, որ փրկագնամամբ կարելի էր ազատվել «ծառայական կապից»⁵¹։ Ճիշտ է, Աբբասյանների ժամանակ գյուղացիության հեռանալը իր համայնքից չէր արգելվում⁵², սակայն մատենագրական որոշ տվյալներից երևում է, որ IX—X դդ. նման արգելք եղել է։ Մի ձեռագրում նշվում է, որ ծառաները ճանաչում էին միայն մի տիրոջ⁵³։ Հետևաբար, չէին կարող տեղափոխվել ուրիշ ֆեոդալ-հողատիրոջ մոտ։ Ինչպես տեսանք, Դերենիկ իշխանի մահից հետո գյուղերն իրենց բնակիչներով նվիրաբերվել են Աղթամարի Ս. Խաչ եկեղեցուն։ Եթե գյուղը բնակիչների հետ ընծայվել է եկեղեցուն, ուրեմն պետք է կարծել, որ նրա բնակիչները եղել են կախյալ և զուրկ տեղաշարժման իրավունքից։ Սովորաբար ֆեոդալ-հողատերերը դեմ էին գյուղացիների՝ իրենց համայնքից հեռանալուն։ Սակայն պետք է կարծել, որ գյուղացին ևս ոչ միշտ էր հակված իր հայրենի գյուղից հեռանալու մտքին, քանի որ դժվար էր ղրկվել տարիներով մշակված անդաստանից, տուն ու տեղից, եթե, իհարկե, առկա էին փոքր ի շատե տանելի պայմաններ։

Մատենագրական կցկտուր տվյալներից երևում է, որ IX—X դդ. Վասպուրականում կիրառվել է վարձու աշխատանք, որի համար վճարվել է դրամով⁵⁴։ Ֆեոդալական հարաբերությունների զարգացման պայմաններում դրամ ձեռք բերելու համար, որքանով որ կարելի է դատել մեր ձեռքի տակ եղած սկզբնաղբյուրներից, հոգևոր ֆեոդալները զբաղվել են նաև առևտրական գործարքներով։ Այս մասին է վկայում X դարի մատենագիր, վասպուրականցի Արամի թուղթը՝ սուղված անձնացյաց Աստմ իշխանին (Գուրգեն Ապուպելճի որդուն), որտեղ մատենագիրը խնդրում է կանխել եկեղեցականների մեջ բուն դրած շահատաքություն հակումը⁵⁵։ Հայտնի է, որ եկեղեցական կանոնները դատապարտում են առևտուրը, վաշխառությունը, գանձակուտակումը, որպես բարոյազանց զբաղմունքներ⁵⁶։ Անշուշտ, կանոնական որոշումները հիմնականում արձազանք էին իրական կյանքում տեղ գտած երևույթների։

Ամփոփելով նշենք, որ Վասպուրականի իշխանությունում V—IX դդ. տեղի է ունենում ֆեոդալական հարաբերությունների հետագա խորացում։ Ֆեոդալականացման երկաբատն ընթացքը կերպափոխեց, ավելի բարդացրեց հողային հարաբերությունները։ Վասպուրականում որոշակի զարգացման հասն ֆեոդալական ինստիտուտները։ Սեպուհության ինստիտուտի վերլուծությունը մեծապես նպաստում է ֆեոդալական հողատիրության զարգացման, ֆեոդալական հարաբերությունների խորացման խնդրի ըմբռնմանը։ Ընդ որում սեպուհության ինստիտուտի ֆեոդալական էությունը ըստ ամենայնի նպաստեց հայրենական բնույթի հողատիրության լայն տարածմանը, Վասպուրականում ֆեոդալական հարաբերությունների ավելի արագ և լայն հիմքի վրա զարգացմանը։ Ավատատիրական հարաբերությունների ըստ ամենայնի զարգացման ընթացքում Վասպուրականի իշխանությունում ֆեոդալական հողասեփականատիրությունը աստիճանաբար ձեռք բերեց ֆեոդալիզմին ներհատուկ աստիճանակարգմանը բնորոշ գծեր։ Այդ հանգամանքի ուժով Արծրունյաց տիրույթներում հողասեփականատեր վերնախավի տարբեր շերտերը միմյանց հետ լծորդվում էին քաղաքական կապերի ու շահախնդրությունների միջոցով։ Հարկ է նշել, որ օտար նվաճողների (Իրան, Արաբական խալիֆայություն) տիրապետության պայմաններում թեև պահպանվեցին հողատիրության ավանդական ձևերը (հայրենականը, պարզեականը), սակայն հաճախ հողասեփականատիրական հինավուրց սկզբունքները խաթարվում էին, փոխվում էր նրանց բովանդակությունը։

51 ՄՄ, ձեռ. № 4067, էջ 14ր։

52 Baladhuri. I. p. 338։

53 ՄՄ, ձեռ. № 911, էջ 99ա։

54 Նույն տեղում, էջ 97ա. ձեռ. № 8343, էջ 51ա։

55 ՄՄ, ձեռ. № 3710, էջ 317 ա-բ։

56 Կանոնագիրք հայոց, աշխ. Վ. Հակոբյանի. Ա, Երևան, 1964, էջ 357։

Այդուհանդերձ, Վասպուրականում Արծրունյաց իշխող տոհմաձուլը և նրա շուրջը համախմբված, վասալական կախվածության մեջ եղող ֆեոդալ-հողատերերը, որոնք կազմում էին ֆեոդալական դասակարգի միջին շերտը, ի վիճակի եղան օտար տիրապետության պայմաններում պահպանել իրենց քաղաքական ինքնուրույնությունը և նույնիսկ ընդլայնել հողային հարստությունը: Վասպուրականի Արծրունյաց իշխանությունում ֆեոդալական հարաբերությունների զարգացմանը նպաստում էր նաև եկեղեցական հողատիրությունը, որը զարգանում էր նույն հիմքերի վրա, ինչ աշխարհիկ հողատերականատիրությունը: Ընդամենն աշխարհիկ ֆեոդալները ամեն կերպ սատարում էին եկեղեցական հողատիրության ընդլայնմանը, եկեղեցու ֆեոդալական հիմքերի ամրապնդմանը, նրա հեղինակության ըստ ամենայնի մեծացմանը:

НЕКОТОРЫЕ ВОПРОСЫ РАЗВИТИЯ ФЕОДАЛЬНОГО ЗЕМЛЕВЛАДЕНИЯ ВАСПУРАКАНА (V—IX вв.)

В. М. ВАРДАНИЯН

Резюме

Васпураканское княжество Арцрунидов являлось государственным образованием с развитыми феодальными институтами. Длительный процесс феодализации региона трансформировал и осложнил поземельные отношения. Рассмотрение института сепухства способствует пониманию и осмыслению проблемы земельной собственности и ее эволюции. Феодальная природа института сепухства обусловила распространение наследственной формы феодального землевладения—айренаканк, которое было общераспространенным явлением. В процессе развития феодальных отношений крупная земельная собственность постепенно приобрела иерархические черты. Разные слои феодальной знати политическими узлами субординировались в княжестве. В период владычества Халифата социально-экономические процессы региона замедлились, порой даже деформировались. Хотя феодалы Васпуракана подверглись частичному уничтожению и экспроприации, однако, уцелевшие князья сохранили свои феодальные прерогативы. В хозяйственном освоении земель региона арабы заметной роли не играли, они в основном не вмешивались в поземельные отношения. Сохранились традиционные формы феодального землевладения—айренаканк и паргевзаканк. Налоги и подати из Васпураканского княжества в форме централизованной феодальной ренты («шррпինի հարկ») входили в казну халифов.

Васпураканская церковь, как крупный землевладелец, способствовала расширению и углублению феодализации региона. Феодалы Васпуракана способствовали укреплению феодальных позиций Васпураканской церкви.